

प्रादेशिक समाचार एकांश
आकाशवाणी रायपुर (छत्तीसगढ़)
प्रादेशिक समाचार बुलेटिन
(छत्तीसगढ़ी)

18.10 सोमवार

दिनांक 10.11.2025

प्रमुख समाचार –

1-छत्तीसगढ़ सरकार ह काली गुजरात के अहमदाबाद म करही निवेशक कनेक्ट कारीकरम – मुख्यमंत्री ह प्रमुख प्रतिभागी मन ल दीही “इनविटेशन टू इन्वेस्ट लेटर”।

2-आईआईटी भिलाई के पांचवां दीक्षांत समारोह आज- जम्मू कश्मीर के उपराज्यपाल ह दू सौ उनहत्तर पढ़इया लइका मन ल दीन उपाधि।

3-प्रदेस म चलत हे मतदाता सूची के बिसेस गहन पुनरीक्षण-एसआईआर के चलत मतदाता मन ल अब तक बांटिन करीबन तिरालीस लाख गणना प्रपत्र।

मुख्यमंत्री निवेशक-कनेक्ट कार्यक्रम

वाणिज्य अउ उद्योग विभाग के माध्यम ले छत्तीसगढ़ सरकार ह काली ग्यारा नवंबर के गुजरात के अहमदाबाद म निवेशक कनेक्ट कारीकरम करही। ए कारीकरम म मुख्यमंत्री विष्णुदेव साय ह सामिल होवइया हे। एमा कपड़ा, फार्मा, फूट प्रोसेसिंग अउ बिजली क्षेत्र म विकास के अवसर के प्रदर्शन होही। एखर अलावा छत्तीसगढ़ सरकार ह प्रमुख प्रतिभागी मन ल “इनविटेशन टू इन्वेस्ट लेटर” देवइया हे, जेखर ले परियोजना मनके जल्दी स्वीकृति अउ नवा उद्योग बर समर्थन ल दिखाय जाही। ए कारीकरम के उद्देश्य औद्योगिक साझेदारी ल मजबूत करना अउ गुजरात के निवेशक समुदाय के संग अंतर्राज्यीय व्यवसायिक अवसर के संभावना ल खोजना हे।

इही बीच, मुख्यमंत्री विष्णुदेव साय ह आज गुजरात के गांधी नगर म “न्यू अ मेकर्स इंस्टीट्यूट ऑफ टेक्नालॉजी-नेमटेक” के भ्रमण करीन। ए संस्थान ह उत्पादन, इंजीनियरिंग अउ टेक्नालॉजी के पढ़ाई ल नवा अउ आधुनिक तरीका ले सिखाय बर जाने जाथे।

अंतर्राष्ट्रीय सम्मेलन-सहकारी कुंभ

केंद्रीय गृह अउ सहकारिता मंत्री अमित शाह ह किहीन हे कि सहरी सहकारी बैंक ल महत्वाकांक्षी युवा अउ समाज के वंचित वर्ग ल सशक्त बनाय बर आगू आना चाही। आज नई दिल्ली म सहरी सहकारी ऋण क्षेत्र म एक अंतर्राष्ट्रीय सम्मेलन-सहकारी कुंभ-दू हजार पच्चीस के उद्घाटन करत हुए श्री शाह ह ए बात ल किहीन। ओमन ए घलो किहीन कि पांच बछर के भीतरी म दू लाख ले जादा आबादी वाले हरेक कस्बा म एक सहरी सहकारी बैंक बनाय के लक्ष्य होना चाही।

आईआईटी भिलाई—दीक्षांत समारोह

भारतीय प्रौद्योगिकीय संस्थान—आईआईटी भिलाई के पांचवां दीक्षांत समारोह ह आज आयोजित होइस, जेमा जम्मू कश्मीर के उपराज्यपाल मनोज सिन्हा ह मुख्य अतिथि के रूप म सामिल होइन। ए बेरा म दू हजार पच्चीस के स्नातक बैच के दू सौ उनहत्तर पढ़इया लइका मन ल उपाधि दे गीस। जेमा पच्चीस डॉक्टर ऑफ फिलॉसफी, चौबीस मास्टर ऑफ साइंस, अठावन मास्टर ऑफ टेक्नालॉजी, दस बैचलर ऑफ टेक्नालॉजी—बीटेक ऑनर्स अउ एक सौ बावन बैचलर ऑफ टेक्नालॉजी—बीटेक के छात्र मन सामिल हरय।

ए कारीकरम के अध्यक्षता आईआईटी भिलाई के बोर्ड ऑफ गवर्नर्स के अध्यक्ष ह करीन।

मुख्यमंत्री—कल्चुरी कलार समाज

मुख्यमंत्री विष्णुदेव साय ह बिलासपुर जिला के रतनपुर म होय कल्चुरी कलार समाज के महासम्मेलन म सामिल होइन। संगेसंग ओमन ह रतनपुर म सौ बिस्तर वाले अस्पताल के स्थापना अउ कल्चुरी समाज के सामुदायिक भवन ल बनाय बर एक करोड़ रुपिया के रासि ल स्वीकृत करे के घोसना करीन।

एसआईआर—गणना प्रपत्र

प्रदेस म मतदाता सूची के बिसेस गहन पुनरीक्षण—एसआईआर के चलत अब तक करीबन तिरालीस लाख मतदाता मन ल गणना प्रपत्र बांटे जा चुके हे, जउन कि मतदाता मनके कुल संख्या के लगभग इक्कीस प्रतिशत हरय। प्रदेस म पंजीकृत मतदाता मनके कुल संख्या दू करोड़ बारह लाख तीस हजार सात सौ सैंतीस हे। चार नवंबर ले एसआईआर के सुरुआत के बाद ले बीएलओ मन ह घर—घर पहुंच के मतदाता मन ल गणना प्रपत्र बांटत हे।

इही बीच, रईपुर—पश्चिम विधानसभा क्षेत्र म भारतीय जनता पार्टी कोति ले मतदाता गहन पुनरीक्षण कार्यसाला के आयोजन करे गीस। ए कार्यसाला ह गुड़ियारी मंडल अउ तात्यापारा मंडल म संपन्न होइस, जेमा बूथ स्तर के पदाधिकारी, कार्यकर्ता अउ बीएलओ मन ह बड़का संख्या म रिहीन। गुड़ियारी मंडल के कार्यसाला म भाजपा के प्रदेस महामंत्री यशवंत जैन ह मुख्य वक्ता के रूप म उपस्थित रिहीन। उहें, तात्यापारा मंडल रईपुर—पश्चिम के विधायक राजेश मूणत ह कार्यकर्ता मन ल संबोधित करत होय प्रसिक्षण दीन।

राज्यपाल सड़क—दुर्घटना

राज्यपाल रमेन डेका ह रईपुर म सरलग बिगड़त यातायात बेवस्था अउ बाढ़त रद्दा दुर्घटना बर चिंता करीन हे। ओमन ह आज राजभवन म कलेक्टर अउ पुलिस अधीक्षक के बइठका लेके एखर बारे म गोठ करके जरूरी कदम उठाय के निरदेस दीन हे। बइठका म राज्यपाल ह किहीन हे कि रद्दा दुर्घटना ल रोके बर जिला प्रशासन अउ पुलिस विभाग ह कड़ाई ले कार्रवाई करय।

राष्ट्रपति दौरा-तैयारी

राष्ट्रपति द्रौपदी मुर्मु के बीस नवंबर के अंबिकापुर दउरा ल लेके तियारी सुरु कर दे गेहे। ओमन ह भगवान बिरसामुंडा के सुरता म होवइया राज्य स्तरीय जनजातीय गौरव दिवस के कारीकरम म मुख्य अतिथि के रूप म सामिल होही। ए कारीकरम ह अंबिकापुर के पीजी कालेज मैदान म होही, जिंहा छत्तीसगढ़ अउ सरगुजा संभाग के जनजातीय समुदाय के लोगन मन रही।

अंबिकापुर कलेक्टर विलास भोसकर अउ वरिष्ठ पुलिस अधीक्षक राजेश अग्रवाल समेत प्रशासन अउ पुलिस के वरिष्ठ अधिकारी मन ह आज कारीकरम स्थल के निरीक्षण करीन। अधिकारी मन ह सबो संबंधित विभाग ले काम ल निर्धारित बेरा म पूरा करे के निरदेस दीन हे।

उपमुख्यमंत्री समीक्षा-बैठक

उपमुख्यमंत्री विजय शर्मा ह आज सुकमा जिला के पूर्वती गांव पहुंचिन। इंहा ओमन नक्सली नेता हिड़मा अउ बारसे देवा के घरवाला मन ले भेंट करीन। ए बेरा म ओमन ह दूनो नक्सली नेता मन ले आत्मसमर्पण करे के अपील करीन।

एखर पहिली, उपमुख्यमंत्री विजय शर्मा ह अपन बस्तर प्रवास के बेरा काली बीजापुर म नक्सल उन्मूलन अउ अंदरूनी क्षेत्र म विकास काम के समीक्षा बइठका लीन। बइठका म ओमन ह नक्सल उन्मूलन के गतिविधि, हालेच म बनाय गे सुरक्षा कैम्प के स्थिति अउ ए क्षेत्र म स्वास्थ्य, शिक्षा, आंगनबाड़ी, रद्दा, बिजली, पानी अउ संचार सुविधा ले जुड़े विकास काम के बारे म जानकारी लीन।

सुपरक्रॉस बाईक रेसिंग चैंपियनशिप

रईपुर के बूढ़ापारा के आउटडोर स्टेडियम म राष्ट्रीय सुपरक्रॉस बाईक रेसिंग चैंपियनशिप के आयोजन करे गीस। ए बेरा म मुख्यमंत्री विष्णुदेव साय समेत कतकोन लोगन ह ए चैंपियनशिप ल देखे बर पहुंचे रिहीन। ए कारीकरम ल संबोधित करत हुए मुख्यमंत्री ह किहीन कि जीवन ह अनमोल हवय। एखरे सेति हमेसा हेलमेट पहिनव, ट्रैफिक नियम के पालन करव अउ जिम्मेदार लोगन बनव। मुख्यमंत्री ह किहीन कि राज्य सरकार ह खेल अधोसंरचना, स्पोर्ट्स टूरिज्म अउ मोटर स्पोर्ट्स जइसे नवा क्षेत्र ल बढ़ावा देबर बड़का कोसिस करत हे। जानबा के अनुसार दू दिन के राष्ट्रय सुपरक्रॉस बाईक रेसिंग चैंपियनशिप म देसभर ले आय दू सौ ले जादा प्रोफेशनल राइडर मन सामिल होइन।

राजेन्द्र देशमुख-अंतर्राष्ट्रीय क्रिकेट मैच

बालोद जिला के छोटकुन गांव बूढ़ानपुर के राजेन्द्र देशमुख के चयन भारतीय दिव्यांग क्रिकेट टीम म होय हे। तेरह नवंबर के श्रीलंका म सुरु होवइया पांचवां टी-ट्वेंटी सीरीज म राजेन्द्र देशमुख ह घलो भारत देस कोति ले क्रिकेट मैच म हिस्सा लिही।

राजेन्द्र ह बतइन कि ओखर जनम बालोद जिला करा बूढ़ानपुर गांव म होय रिहीस। स्कूल जीवन ले ही क्रिकेट खेले जात रिहीस। ओमन ह बछर दू हजार अट्टारा म दिव्यांग क्रिकेट ट्रायल दीन अउ बढ़िया बालिंग अउ बैटिंग के दम

म छत्तीसगढ़ टीम म चयनित होइन। अभी तक ओमन ह छत्तीसगढ़ कोति ले डेढ़ सौ ले जादा मैच खेजे जा चुके हे। बछर दू हजार तेईस म राजेन्द्र ह भारतीय दिव्यांग के टीम म अपन जघा बनाइन। ओमन ह बतइन कि बचपन लेही एक हाथ दिव्यांग होय के बाद घलो ओला भूलके पढ़ाई अउ क्रिकेट म पूरा धियान ल केंद्रित करीन। ओखर लक्ष्य श्रीलंका म होवइया टी-ट्वेंटी सीरीज म अच्छा प्रदर्शन करना हे।

संक्षिप्त समाचार

थोरकुन समाचार सार म –

—मुख्यमंत्री विष्णुदेव साय ह आज गांधी नगर म गुजरात के मुख्यमंत्री भूपेन्द्र पटेल ले भेंट करीन। ए बेरा म दूनो मुख्यमंत्री मन ह आपसी सहयोग अउ विकास के अनुभव ल साझा करीन।

—राज्यपाल रमेन डेका ह इंदिरागांधी कृषि विश्वविद्यालय रईपुर के प्रोफेसर डॉक्टर राजेन्द्र लकपाले ल अंबिकापुर के संत गहिरा गुरु विश्व विद्यालय के नवा कुलपति नियुक्त करीन हे।

—मुख्यमंत्री विष्णुदेव साय ह आज रईपुर के स्वामी विवेकानंद विमानतल परिसर माना कैम्प तीर स्टेट हँगर के नियमित परिचालन के सुभारंभ करीन।

—राज्यपाल रमेन डेका ह राज्य म सिकलसेल अउ टीबी जइसे गंभीर बीमारी ल रोके बर ठोस कदम उठाय के निरदेस दीन हे। ओमन ह आज राजभवन म लोकस्वास्थ्य अउ परिवार कल्याण अउ चिकित्सा शिक्षा विभाग के सचिव अमित कटारिया के संग बइठका करके ए बिसय म गोठ करीन।

